

四部叢刊

白氏文集(二)

125

四部叢刊初編集部

白氏長慶集

三

卷四十九至卷七十一

據商務印書館一九二六年版重印

四部叢刊初編（一二三——一二五）

白氏文集（三冊） 唐白居易撰

上海書店印行

上海福州路四二四號

上海影印廠印刷

白氏文集卷第四十九

判 五十道

得甲去妻後妻犯罪請用子蔭贖罪

甲怒不許

二姓好合義有時絕三年生育恩不可遺
鳳雖阻於和鳴烏豈忘於返哺旋觀怨偶
遽抵明刑王吉去妻斷絃未續孔氏出母
踈網將加誠鞠育之可思何患難之不救
况不安爾室盡孝猶慰母心薄送我畿贖

罪寧辭子蔭縱下山之有怒曷陟岵之無
情想茆首之歌且聞樂有其子念葛藟之
義豈不忍庇于根難抑其辭請敦不匱
得辛氏夫遇盜而死遂求殺盜者而
爲之妻或責其失貞行之節不伏
親以恩成有讎寧捨嫁則義絕雖報奚爲
辛氏姑務雪冤靡思違禮勵釋憾之志將
矜翟蒲蓄許嫁之心則乘松竹沉居喪未
卒改適無文苟失節於未亡雖復仇而何

有夫讎不報未足爲非婦道有虧誠宜自
恥詩著靡他之誓百代可知禮垂不嫁之
文一言以蔽無効尤於邾婦庶繼美於恭
姜

得乙與丁俱應拔萃乙則趨時以求
名丁則勤學以待命互有相非未知
孰是

立已徇名則由進取修身俟命寧在躁求
智乎雖不失時仁者豈宜棄本屬科懸拔

萃才選出群勤苦修辭乙不能也吹噓附
勢丁亦恥之躁靜既殊性習遂遠各從所
好爾由徑而方行難強不能吾捨道而奚
適觀得失之路或似由人推通塞之門誠
應在命所宜勵志焉用趨時若棄以菲葑
失則自求諸已儻中其正鵠得亦不愧於
人無尚苟求盍嘉自致

得丁冒名事發法司准法科罪節度
使奏丁在官有美政請免罪真授以

勸能者法司以亂法不許

宥則利濫誅則傷善失人猶可壞法實難
丁僭濫爲心僇俛從事始假名而作僞咎
則自貽因勵節而爲官政將可取節使以
功惟補過請欲勸能憲司以仁不惠姦議
難亂紀制宜經久理貴從長見小善而必
求材雖苟得踰大防而不禁弊將若何濟
時不在於一夫守法宜遵乎三尺盡懲行
詐勿許拜真

得乙上封請求不用赦大理云廢赦
何以使人自新乙云數赦則姦生恐
弊轉甚

刑乃天威赦惟王澤于以御下存乎建中
上封以宥過利濫倖門宜閉大理以盪邪
除舊權道當行皆推濟國之誠未達隨時
之義何則政包寬猛法有弛張習以生常
則起爲姦之弊廢而不用何成作解之恩
請思砭石之言兼詠蓼蕭之什數則不可

無之亦難

得景居喪年老毀瘠或非其過禮景
云哀情所鍾

孝乃行先則當銜恤子爲親後安可危身
景喪則未終老其將至懷慕義之慕誠合
盡哀迫桑榆之光豈宜致毀所以爰從肉
食唯服麻縗沉血氣之既衰老夫耄矣縱
哀情之罔極吾子忍之苟滅性而不勝則
傷生而非孝因殺立節庶畢三年之喪順

變從宜無及一朝之患既虧念始當愧或非

得辛奉使遇昆弟之仇不鬪而過爲
友人責辭云銜君命

居兄之仇避爲不悌銜君之命鬪則非忠
將滅私而奉公宜棄小而取大辛時惟奉
使出乃遇讎斷手之痛不忘誠難共國飲
冰之命未復安可害公郎以忠全情由禮
抑未失使臣之體何速諍友之規史駢立

言嘗聞之矣子夏有問而忘諸乎是謂盡忠于何致責

聞軍帥選將多用文儒士兵部詰其無武藝帥云取其謀也

忘身死節誠重武夫制敵伐謀則先儒士將籌策而可尚奚騎射之足稱軍帥明以知兵精於選將以爲寧弧學劍用無出於一夫悅禮教詩道可弘於七德功宜保大理貴從長若王師之有征以謀則可苟戎

略之無取雖藝何爲况晉謀中軍選於義
府漢求上將舉在儒流豈惟我武惟揚誠
亦斯文不墜元戎舉德未爽能軍兵部執
言恐爲辱國

得甲至華嶽廟不禱而過或非其違
衆甲云禱非禮也

嶽則配天自修常事神雖福善安可苟求
宜率道以去邪豈從衆而失正甲志惟守
義言乃合經以爲視以三公實天子之所

饗降其百福寧匹夫之可讓如修蘋藻之
誠是用秕稗之禮況人之僭濫徒欲乞靈
而神實聰明豈歆滛祀非鬼是爲諂也黷
神無乃吐之旅於泰山古猶致誚禱于華
嶽今豈不非諒正直之難誣雖馨香而勿
用將勸來者所宜救歟

得乙隱居徵辟不起子孫請以所辟
官用蔭所司不許

修身獨善寵則可驚制爵尊賢命其難廢

形雖遺於軒冕蔭宜及於子孫乙貞以自
居辟而不起鶴書莫顧雖忘恤後之心爵
命已行寧闕賞延之典若使死無用蔭生
不及榮何成旌善之風且是廢君之命塲
苗不食誠自絕於繫維葛藟有陰義難虧
於燕翼請優後嗣以獎外臣

得江南諸州送庸調四月至上都戶
部科其違限訴云冬月運路水淺故
不及春至

賊納過時必先問罪淹恤有故亦可徵辭
月既及於正陽事宜歸於宰旅展如澤國
蓋納地征歲有入貢之程敢忘慎守川無
負舟之力寧免稽遲苟利涉之惟艱雖愆
期而必宥地官致詰月其憂江郡執言
後時可憑然恐事非靡盬辭或憑虛請驗
所屆公文而後可遵令典

得景爲縣令教人煮木爲酪州司責
其煩擾辭云以備凶年

事不舉中有災寧救政或擾下雖惠何爲
景念在濟時動非率法且煩人而不恤是
昧烹鮮何歉歲以爲虞將勤耨酪信作勞
於無用豈爲教之有方必也志切救災道
敦行古周官荒政自可擇其善者新室弊
法焉用尤而効之宜聽責言勿迷知過
得丁爲郡守行縣見昆弟相訟者乃
閉閤思過或告其矯辭云欲使以田
相讓也